

654

003

W-30

8

39
D

MAY 1912

THE UNIVERSITY OF CHICAGO
LIBRARY
410-1512-1912

Ս. ԷԶՄԻԱՆԵՒ ԼՐԱՏԱՐԱԿՈՒԹԻՒՆ

5 MAY 2005

003
V-30

ՀԱՅ ԳՐԻ ԵՒ ՏՊԱԳՐՈՒԹԵԱՆ


ՄԵԾ ՅՈՒԵԼԵԱՆԸ

412—1512—1912

1002
7387

Գ Ր Ե Գ

Գ Է Ո Ր Գ Վ Լ Թ Ո Ւ Ն Ե Ա Ն



ԷԼԵԿՏՐՈՆԱԿԱՆ ՄԱՅՐ ԱՅՐՈՒՅ

4 FEB 2013

654

1913-1913-1913

Հրամանաւ


Տ. Տ. Գ Է Ո Ր Գ Ե.

ՍՐԱՆՁՆԱԳՈՅՆ ԿԱԹՈՂԻԿՈՍՏԻ

Ամեայն Հայոց



Ս. ՄԵՍՐՈՐԵ



ՄԵԾ ՅՈՒՆԵՍԿՈՒՆԸ

Այս տարի լրանում է չորս հարիւր տարի
այն օրուանից, երբ առաջին հայերէն գիրքը
տպուեցաւ և հազար հինգ հարիւր տարի, երբ
առաջին անգամ Հայկական գիրն ստեղծուե-
ցաւ: Բոլոր մանր ու խոշոր յոբելեաններէ մէջ
այդ յոբելեանը ամենամեծն է, որ հայը մինչև
օրս կատարել է: Հայկական տառերի չորսհա-
րիւրամեայ յոբելեանը և Հայոց գրերի գիւտի
հազարհինգհարիւրամեակը արտաքոյ կարգի
կարևոր ու նշանակալից մի տօն է մեզ հա-
յերիս համար: Նա մեր գրականութեան, մեր
մտաւոր յառաջադիմութեան ու ընդհանրա-
պէս մեր ազգային քաղաքակրթութեան տօնն
է: Այս տարուայ մեծ յոբելեանը տօնն է այն
ամենի, ինչ որ մենք հայերս հանգէս ենք
բերել մտաւորի, հոգեկանի և գրականի շըր-
ջանում: Գրի, գրականութեան երևոյթն
այժմ այնքան ընդհանրացած է, որ մենք
նոյն իսկ չենք էլ կարող լաւ ըմբռնել նրա
նշանակութիւնը, այդ նշանակութեան ահա-
գին արժէքը, որովհետև կարծում ենք, թէ

ազգերը միշտ էլ գիր են ունեցել, մարդիկ առանց գրի երբեք չեն եղել:

Բայց այդպէս չէ ի հարկէ: Մարդկութեան անցեալը մեզ պատմում է, որ սրանից հազարաւոր տարիներ առաջ շատ ազգեր գիր չեն ունեցել, իսկ աւելի առաջ ոչ մի ազգ չէ օգտուել այդ աստուածային շնորհից: Գրի գործածութիւնը 7 — 8 հազար տարի է, որ յայտնի է մարդկութեանը. դրանից առաջ մեզ յայտնի չէ ոչ մի տեղեկութիւն մարդկութեան վիճակի մասին: Այն հեռաւոր, խաւար ու միգապատ օրերին մարդիկ ապրում էին երեխաների նման, կտրուած աշխարհի միւս մասերից, մարդկային միւս խմբերից — լոկ ներկայով. նրանց համար անցեալը իրականութիւն չէր: Ժամանակը չունէր այն կրթիչ նշանակութիւնը, ինչ որ նա այսօր քաղաքակիրթ աշխարհում ունի: Մարդկանց մէջ չկար մի միջոց, որով հնարաւոր լինէր պահել, պահպանել անցեալ սերունդների աշխատանքը, նրանց ձեռք բերած փորձերը: Գիր-գրականութիւն չունեցող մարդկութիւնը չէր կարող անցած սերունդների՝ իւր պապերի ու հայրերի իմաստութիւնից օգտուել, որովհետեւ այդ իմաստու-

թիւնը շատ շուտով մոռացւում էր և չկար մի հնար, որով կարելի լինէր բռնել, պահել ու ամրացնել այդ անցեալը:

Յիշողութիւնն էր միայն, որով գրից զուրկ մարդկութիւնը պարծենալ կարող էր: Անգիր կերպով, բերնէ բերան անցնելով, սերունդից սերունդ թռչելով էին միայն պահպանում որ և է տեղի անցեալ աշխատանքները և հասնում ներկային: Բերանացի ականդութիւնն էր այն միակ միջոցը, որով զանազան սերունդներ իրար մասին որ և է հասկացողութիւն էին կազմում: Նոյն բերանացի հաղորդութիւնն էր, որով տարածութեամբ իրարից անշատ, հեռու և մօտիկ մարդիկ իրար հետ խօսել, իրարու միտք հաղորդել կարող էին:

Սակայն այդ միջոցը շատ խախտւտ և անհաստատ էր, որովհետեւ մարդկանց յիշողութիւնը միատեսակ զօրեղ չէ և մարդիկ միատեսակ ընդունակ չեն որ և է իրողութիւն նոյնութեամբ և պարզութեամբ հաղորդելու: Դրա փառաւոր ապացոյցն անշուշտ այսօր մեր աչքի առաջն է: Պատմական մի նշանաւոր երևոյթ ժողովրդի մէջ առանց արձուկանգի չի մնում: Իւրաքանչիւր քիչ թէ

շատ աչքի ընկնող դէպք և իրողութիւն պատմում է ժողովրդի մէջ անգիր կերպով — բերնէ-բերան ու այդ եղանակով հաղորդւում յաջորդ սերունդներին: Բայց միեւնոյն դէպքը զանազան մարդկանց կողմից միեւնոյն եղանակով չի պատմւում: Նայած պատմողի յիշողութեանը, երեակայութեանը, նրա դիտելու և պատմելու ընդունակութիւններին — նրա պատմութիւնը ենթարկւում է քիչ թէ շատ փոփոխութիւնների. և քանի շատ լինի հաղորդող անհատների կամ սերունդների թիւը, քանի մեծ լինի դէպքի վրայով սահած, անցած ժամանակի տևողութիւնը, այնքան մեծ կըլինի առաջ բերած տարբերութիւնը, այնքան անսման կըլինին այդ դէպքը և դէպքի մասին եղած պատմութիւնը:

Չնայած բերանացի աւանդութեան անհաստատ և խախտւա դրութեանը, մարդիկ տասնեակ և հարիւր հազարաւոր տարիներ շարունակ օգտուել են դրանից, բերնէ բերան, սերունդէ սերունդ հաղորդել անցեալից մնացած թոյլ յիշողութիւնները, անցեալ ժամանակների, դէպքերի և նշանաւոր հերոսների գործերի թոյլ արձականքը: Այդ

եղանակով ձեռք բերուած հատ ու կտոր տեղեկութիւններն ընդհանուր առմամբ մութն են ու աղօտ. անհայտ է պատճառը, որ մենք առանձին հպարտութեամբ երեխայ կարող ենք անուանել զրից զուրկ մարդկութիւնը, երեխայ այն մտքով, որ նա ապրել է լոկ ներկայով, ներկայի համար, անցեալը չի ճանաչել և ապագայի մասին հոգս ու ծրագիր չի ունեցել:

Բայց մարդկութիւնն այդ վիճակի մէջ մնալ չէր կարող. բնութիւնը առել է մի անագին գանձ, ամենամեծ գանձը, որ մարդն ունի և որի շնորհիւ ձեռք են բերւում միւս՝ երկրորդական գանձերը. դա մարդու բանականութիւնն է: Շնորհիւ հասկանալու, դատելու և ըմբռնելու ընդունակութեան է, որ մարդը բարձրացել, տարբերուել է իրան շրջապատող բնութիւնից՝ կենդանական աշխարհից. եւ շնորհիւ բանականութեան է, որ մարդը չի կարողացել երկար դիմանալ առանց զրի ու գրականութեան: Կեանքը հետզհետէ բարդանալով և նրբանալով մարդուն ստիպել է ստեղծել մի միջոց, որով հնարաւոր լինէր հաստատուն և անփոփոխ կերպով հաղորդել մեր մտքերն ու ցանկու-

թիւնները, դրոշմել անցեալի դէպքերը անփակտելի կերպով ու աւելի հիմնաւոր կերպով քաշել ապագայի հոգսը:

Մի սերունդ չէ, որ զգում է այդ կարիքը. դարեր ու հազարամեակներ են սահում, մինչև որ թոյլ փորձերը փառքով են պսակւում և մարդկութեանը յաջողում է ձեռք բերել սկզբում որոշ պայմանական պատկերներ՝ նկարելու այս կամ այն միաբնակ, այս կամ այն խօսքը և ապա պայմանական նշաններ — արտայայտելու այս կամ այն հրնչիւնը:

Այդ շրջանը մարդկային կեանքի մէջ ամենափառաւոր վարկիւմն է. այդ ժամից նա ունէր մի միջոց — տեսածն ու լսածը, ցանկացածն ու մտածածը դրոշմել քարերի և աղիւնների վրայ, բռնել, կանգնեցնել մի բոլոր ժամանակի անիւր և նրա թրթիւնները հաստատուն, ճշմարտապատում և հաւատարիմ կերպով հաղորդել յաջորդ սերունդներին: Հաստատապիւնդ քարերն և զրանիտէ սև ժայռակոյտերը ծածկւում են նոր ձեռք բերած գանձով — նշանագրերով. և ուրախ ու հպարտ մարդկութիւնն այդ անդրդուելի ժայռերի վրայով գալիք ժամանակներին

պատմում է իւր աստուածների ու հերոսների, իւր անաւոր կռիւնների ու շարժումների մասին: Աղիւնն ու քարը, սև ու ամուր ժայռը բախտ են ունենում լինելու մարդկութեան առաջին գիրքը — մի տեղ, ուր արդէն քաղաքակրթութեան շէմքը ոտք դրած մարդկութիւնը գրում է իւր պատմութիւնը: Ժամանակը՝ շնորհիւ գրերի հետզհետէ սկսում է վայր առնել վրայից հաստ ու անթափանց քօղը և տարածութիւնը կամաց կամաց բաց է անում իւր անդրնդախոր անկիւնները. սերունդներն իրար մօտենում են, աշխարհի զանազան անկիւններում ապրող ցեղերն իրար հասկանում են, իրար մօտ գալիս:

*
* *

Սակայն այդ հրաշալի գիւտը բոլոր ժողովուրդների մէջ միատեսակ և միաժամանակ չէ եղել: Աշխարհագրական և բնական աւելի բախտաւոր շրջաններում ապրող ժողովուրդները, որոնք հնարաւորութիւն ունէին ուրիշ ցեղերի հետ աւելի շուտ ու յաճախակի յարաբերութիւն ունենալու, բնականաբար աւելի շուտ պիտի զգային գիր ունենալու պա-

հանջը: Մտաւորապէս առաջ գնալու ներքին մղումը մի կողմից, շարժուն ու կենդանի վաճառականութեան միջոցով միւս ցեղերին ճանաչելն ու մօտենալը միւս կողմից զօրեղապէս հրապարակի վրայ են դնում գիր ու գրականութիւն ունենալու անհրաժեշտութիւնը: Ծովերի ափերին ու մեծ գետերի հովիտներում ապրող ժողովուրդները համեմատաբար աւելի շուտ են կարողանում այդ պահանջին բաւարարութիւն տալ: Նշանագրերի գիւտն ու գործածութիւնը՝ ամեն անգամ իւրատեսակ և յատուկ կերպով՝ թափանցում է հետզհետէ նաև միւս ժողովուրդների մէջ ու ցեղերն ու ազգերը իրար յետևից թեւակոխում են քաղաքակիրթ ազգութիւնների շարքը:

*
* *

Մեզ հայերիս համար մեծ բախտ է ու ազգային պարծանք, որ մենք ևս բաւական երկար ժամանակ վայելում ենք այդ աստուածային պարգևի, գրի ու գրականութեան պտուղները: Այսօր մենք ևս առանց մի րոպէ վարանելու և տատանուելու համարձակօրէն մեզ քաղաքակիրթ ազգերի շարքն ենք դա-

նում դարձեալ գրի և գրականութեան շնորհիւ: Հազարաւոր տարիների փոքր ու մեծ գանձերի մէջ չկայ մի ուրիշը, որ այսօր գրերի երկար շարքի միջով կանգնի երկնաբարձ գլխով հպարտ ու սիգապանծ ու փորձառու հայեացքն ուղղելով ներկայ սերունդին բացականչել կարողանայ. ես եմ քո փառքը—ամենամեծը, որ դու ունիս, իմացիր սրահել ու պահպանել այդ:—Այդ գանձը հայի գիրն ու գրականութիւնն է, նրա զբաւրոյցն ու դպրութիւնը, նրա քաղաքակրթութիւնը:

Հետեւե՛ք մեր գրի և գրականութեան սկզբնաւորութեանը:

*
* *

Հինգերորդ դարն էր, մեզանից 1500 տարի առաջ. այն ժամանակն էր, երբ Հայկական արքայական գահի վրայ դեռ բազմում էր հայ Արշակունի թագաւորը, երբ դեռ գոյութիւն ունէին Հայկական մեծ պետութեան թէկուզ թոյլ մնացորդները, երբ Հայոց մայրաքաղաքում՝ Վաղարշապատում դեռ տեղի էին ունենում հայ զօրագնդերի զօրահանդէսներ, Հայոց մայրաքաղաքի վրա-

յով դեռ ծածանւում էր Արշակունիներէի ար-
ծուանի դրօշակը:

Սակայն գրի ու գրականութեան ծագումն
ուսկողմանորութիւնը, այդ հրաշալի գանձի
պահանջն ու կարիքը հայ թագաւորներէ, իշ-
խաններէ, հայ աշխարհիկ տարրի մէջ չէ, որ
զգացւում է ամենից առաջ և ամենից ուժեղ
կերպով: Մենք դրանից առաջ ունեցել ենք
քաղաքական աւելի փայլուն շրջաններ, երբ
հայ զօրականի սուրը աւելի կտրուկ է եղել
և հայ թագաւորի խօսքը շատ աւելի հեռուն
լսելի: Տիգրան Մեծի օրով մեզ յայտնի չէ
հայ գիր ու գրականութիւն: Տիգրանի ու-
նրա յաջորդների օրով չէր էլ կարող հայ
գրերի կարիքը խորապէս զգացուել, որով-
հետև Հայոց ա. քունիքը մերթ Պարսից, մերթ
Հռոմայեցւոց ազդեցութեան տակ՝ իւր գրա-
ւոր կարիքներին օտար գրերով էր բաւա-
կանութիւն տալիս: Հայ թագաւորները իրենց
դրամներն ու հրովարտակները օտար լեզուով
են գրում: Մարգիկ չէին գգում սեփական
գիր ունենալու, յատուկ գրականութիւն ու-
նենալու պահանջը, կամ գգում էին չափա-
զանց թոյլ կերպով: Սակաւաթիւ հայերը,
որոնք պաշտօն էին ունենալու արքայական

և իշխանական դիւաններում և դեկավարում
էին ամբողջ դիւանական գործը, բաւական
է, որ գիտենային տիրող լեզուն—կամ պարս-
կերէնը, կամ լատիներէնն ու յունարէնը—
զգացուած պահանջն արդէն բաւականու-
թիւն էր գտնում: Շատ անգամ էլ այդ անձ-
նաւորութիւնները օտար ազգութիւններից
էին լինում: Բուն հայ ժողովրդի պահանջ-
ների համար դեռ հարկաւոր չէր հայ գիրը
և Հայոց արքունիքը երկար դարեր յար-
մարւում էր գրութեանը. պէտք եկած տեղում
գործ է ածում օտար գրեր:

Գրութիւնը փոխւում է բոլորովին, երբ
քրիստոնէութիւնը Հայաստան է մուտք գոր-
ծում: Այն օրերին, երբ Գրիգոր Լուսաւորիչ
իւր բազմաթիւ օգնականների հետ Հայաս-
տանում քրիստոնէութիւն էր քարոզում ու
հեթանոս հայերին լուսաւորել ձգտում, դար-
ձեալ օտար գրերից ու գրականութիւնից էր
օգտւում: Քրիստոնէութեան աղբիւրը՝ Աւե-
տարանն ու Աստուածաշունչը օտար լեզու-
ներով էին, ասորերէն, յունարէն. և Հայի
Լուսաւորիչը ստիպուած էր դիմել այդ օտար
լեզուներին, այնտեղից, օտար ազգերի գրա-
կանութիւնից քաղելու քրիստոնէութեան

սերմերը ու ապա ցանել հայ հողի վրայ: Բնական է, որ աշխատանքը չափազանց մեծ էր ու դժուարին ու արդիւնքը սպասածից աւելի պակաս: Հայ քարոզիչը կանգնած էր մի հսկայական դժուարութեան առաջ. քրիստոնէութեան նոր պատգամները նա պիտի հասկացնէր, տարածէր հեթանոսութիւնից նոր դարձած հայերին, բայց այդ գործն հիմնաւոր կերպով կատարելու համար հարկաւոր էր նոր կրօնի տարրերը սովորեցնել, հարկաւոր էր դպրոց: Իսկ դպրոց չունէին այդ ժամանակ հայերը, դպրոցի հետ չունէին նաև ուսուցիչ: Հայը գիր չունէր, որով սովորէր. հայ վարդապետը սովորեցնելու ոչ մի հնար չունէր: Նրա միջոցները օտար լեզուներն էին, որոնք չէին նպաստում նպատակին հասնելու և յուսահատեցնում էին հայ քարոզչին: Մինչդեռ հային շրջապատող ազգերը — յոյն, հռոմայեցի, ասորի, հրեայ — ունէին իրանց սեփական գիրն ու գրականութիւնը և կրօնի ոգին ու տարրերը բացատրելիս օգտուում էին հարազատ գրականութիւնից կամ քրիստոնէութեան լոյսը առնում էին բուն իսկ աղբիւրից՝ մայրենի լեզուով գրուած աւետարանից, հայ վար-

դապետն ընդհակառակը իւր քարոզչական դառն վիճակի մէջ նախանձով էր նայում իւր բախտաւոր հարեաններին: Քանի պահանջը մեծանում է որքան կարելի է շատ հայերի քրիստոնեայ դարձնել ու հիմնովին խորտակել հեթանոսութեան ուժն Հայաստանում, այնքան էլ սեփական սուրբ Գիրք, բուն Հայկական տառերով գրուած աւետարանն ունենալու կարիքն է հերթական դառնում ու զբաղեցնում լուսագոյն հայ վարդապետներին: Այդ պահանջը գնալով սաստկանում է և վերջապէս իւր գազաթնակէտին է հասնում հինգերորդ դարի սկզբում, սրանից 1500 տարի առաջ, որսեղից և Հայոց ազգին փրկութիւն էր գալու:

Մեր ազգային պատմութիւնն այդ ժամանակ երեք նշանաւոր անուն է մեզ աւանդում. ժամանակի Հայոց թագաւոր Վռամ-շապուհ, Գրիգոր Լուսաւորչի վերջին շառաւիղ Սահակ կաթողիկոս և Տարսնեցի մի հասարակ վանական — Մեսրոպ Մաշտոց: Հայ գրի ու գրականութեան, դպրոցի ու կրթութեան սկիզբն էլ կապուած է հենց այդ երեք հոշակաւոր անունների հետ: Հայոց աշխարհում աշխարհական և հոգեւոր իշխա-

1887
1001

նութիւնները, Հայոց թագաւորն ու Հայոց կաթողիկոսը միացել, ձեռք էին կառկառել միահամուռ ուժերով հնարներ ստեղծելու սկիզբ դնելու համար սեփական գրի ու գրականութեան: Եւ այդ համերաշխ գործակցութիւնը պսակուեց է ամենափառաւոր յաջողութեամբ և հինգերորդ դարի Հայը ապրում է Հայոց պատմութեան, կեանքի ու զրականութեան ոսկեդարը:

Մի փոքր աւելի մօտիկից նայենք Հայկական անցեալի այդ փառաւոր շրջանին:

*
* *

Ժամանակի կաթողիկոսն, ինչպէս ասացինք, ս. Սահակն էր, Մեծն Ներսէսի որդին, Լուսաւորչի վերջին շառաւիղը: Հեզ, բարեսիրտ, քրիստոնէական ոգով տոգորուած միանձնաւորութիւն էր ս. Սահակը: Կրթուած լինելով հելլենական զրականութեան ու արուեստի մէջ, ամբողջ հոգով հակուած էր յունաց կողմը, թէև Հայաստանի քաղաքական բաժանուածութեան պատճառով ստիպուած էր Պարսից հպատակուել և Պարսից մասի Հայաստանի մէջ ապրել: Ս. Սահակ գինուած իւր դիրքի և աստիճանի բարձր

հեղինակութեամբ, Հայոց Վառնապուհ թագաւորի հետ համերաշխ, աշխատում է Հայոց մութ աշխարհը քրիստոնէական լոյսով լուսաւորել, հայերին ամրապնդել նոր հաւատի մէջ և կենդանի խօսքը քարոզել:

Այդ օրերին էր ահա, որ Սահակ կաթողիկոսի մօտ մի մարդ է գալիս, մի սոսկ վանական՝ Հայաստանի հեռաւոր գաւառներից — Տարօնից. Վարդան անունով մի հասարակ մարդու որդի էր նա, Հացեկաց գիւղից: Դեռ մանուկ հասակից վարժուել էր ժամանակի բարձր կրթութեան ու զարգացման մէջ — ուսել էր հելլենական դպրութիւնը: Նա սկզբում ունեցել է աշխարհիկ ցանկութիւն և հակումներ. եղել է Հայոց արքայի դիւանի տեսուչ և կառավարիչ, երկար ժամանակ զբաղուել է հայ թագաւորների հրամանները զրելով և տարածելով — օտար լեզուներով, ի հարկէ: Սիրել է գինւորական ծառայութիւնը, ցանկացել է պատերազմող բանակի մէջ մանել. բայց Հայոց ազգի մի աննման բախտով թողնում է այդ մտադրութիւնը, տարւում է ժամանակի լուսագոյն մարդկանց յափշտակութեամբ, ընդունում է հոգևոր կոչումն ու կենդանի քարոզչի դերն ստանձնում:

Քաջ և անվեհեր Մեսրոբն այնուհետև
 ոչ մի բանի առաջ չի կանգնում. իւր ներքին
 աշխարհը կենդրոնացնելու և ամբողջացնելու
 համար նա մի առժամանակ առանձնանում,
 ճգնաւորական կեանք է վարում: Սակայն շու-
 տով իւր շուրջն է հաւնքում աշակերտներ ու
 սկսում է նրանց քարոզել քրիստոնէութիւնը:
 Աշակերտների հետ միասին դիմում է ապա
 Հայաստանի ամենավտանգաւոր գաւառնե-
 նից մէկը - «անկարգ ու անդարման» Գող-
 թան գաւառը: Հեթանոսութիւնը դեռ չէր
 ջնջուել Հայաստանի շատ մասերից: Հարիւր
 տարի հազիւ լինէր, որ հեթանոս հայութիւնը
 քրիստոնեայ էր դարձել. բնականաբար դեռ
 շատ գաւառներում, Հայաստանի շատ խուլ
 և մեկուսացած անկիւններում կարող էր
 հեթանոսութիւնն ապրել և ժամանակ առ
 ժամանակ գլուխ բարձրացնել: Գողթան գա-
 ւառը այդպիսի վայրերից մէկն էր: Հարկա-
 ւոր էր խորտակել հեթանոս Գողթնցիների
 յամառութիւնը - հարկաւոր էր զօրեղ և ազ-
 դու քարոզիչ լինել Քրիստոսի վարդապե-
 տութեան:

Ու Մեսրոպը սկսում է քարոզել. ու
 այստեղ առաջին անգամ թերևս զգացւում է

այն մեծ պակասը, այն բուռն կարիքը, որին
 բաւարարութիւն տալով Հայոց համար նոր
 դարազրուի էր բացուելու, հիմք էր դրուելու
 Հայոց մտաւոր բովանդակ կեանքին: Այս-
 տեղ, այս բարբարոս ու հեթանոս Գողթն-
 ցիների մէջ գործելիս՝ Մեսրոբ առաջին ան-
 գամ ուժգնօրէն ու հզօրապէս զգում է սե-
 փական գիր ունենալու մեծ կարիքը: Նա
 տեսնում է, որ մենակ ինքը չէ կարող և
 հնարաւորութիւն չունի այդ կարիքին բա-
 ւարարութիւն տալ: Զգում է, որ դպրոցներ
 են հարկաւոր. նախանձով է յիշում հարեան
 ազգերի բազմաթիւ դպրոցները, նրանց գիրն
 ու գրականութիւնը: Միանգամից ըմբռնում
 է, որ չի կարելի հայ մարդկանց օտարազիր՝
 յունարէն կամ ասորերէն գրուած աւետա-
 տարանով քրիստոնէութիւն քարոզել: Սե-
 փական տառեր ու հայագիր Աստուածաշունչ
 ունենալու պահանջը միանգամից գալիս
 լցւում է Մեսրոբի սիրտը և նա այնուհետև
 յափշտակուած այդ մտքով մոռանում է ամեն
 բան. և մի աստուածային ոգևորութեամբ
 լցուած այդ կարիքի գիտակցութեամբ է ապ-
 րում:

Սակայն նա մենակ ոչինչ չէր կարող

անել. պէտք էր դիմել Հայաստանի կենդրոնը՝ հայ թագաւորներին ու կաթողիկոսներին մայրաքաղաքը — Վաղարշապատ, որտեղ թերեւս օժանդակութիւն ու խորհուրդներ կարելի լինէր գտնել այդ մտքի իրագործման համար:

Ու մտքերի ու խորհուրդների ծփանքի մէջ տարուբերուելով Մեսրոբ Գողթան գաւառից դիմում է դէպի Վաղարշապատ: Քանի մօտենում է սրբազան ու վեհաշուք մայրաքաղաքին, այնքան աւելի է զարկում նրա սիրտը, այնքան աճում է նրա անհանգստութիւնը: Ահա նա տեսաւ մայրաքաղաքի գրամբէթները ու արքայական ապարանքի բարձր, հպարտ աշտարակները ու արծուանիշ մեծ դարբասով ներս մտաւ:

*
* *

Սահակ կաթողիկոսին մենք արդէն գիտենք և առաջուց զգում ենք Մեսրոբին ցոյց տուած նրա վերաբերմունքը: Չէ՞ որ Հայոց կաթողիկոսն ևս պակաս չէր զգայ սեփական գիր ու դպրութիւն ունենալու կարիքը. չէ՞ սր նա ևս նոյնպիսի և աւելի դժուարութեանց էր հանդիպել և շարունակ հանդիպելու էր Քրիստոսի կեանքն ու ուսմունքը քարոզե-

լիս: Հայոց եկեղեցիներում յունարէն ու ասորերէն աստուածաչունչն էր լսելի: աղօթքներն ու մաղթանքներն օտար էին հայ աղօթողների համար: Կարիքը գնալով մեծանում, ծովանում էր և սեփական գիր ու դպրութիւն ունենալու պահանջը աւելի ու աւելի համակում հասկացող մարդկանց սրտերը: Բնական է, որ Սահակ կաթողիկոսն առանձին ուրախութեամբ ու բերկրանքով ընդունէր Մեսրոբ քարոզչին ու պատրաստ լինէր նրա հետ միասին միջոց ու հնար փնտրելու ընդհանուր Հայոց անգարման ցաւին մի դարման գտնելու:

Հայոց մայրաքաղաքն այնուհետեւ մի սրտաշարժ ու յուզիչ տեսարան էր ներկայացնում: Երբեմն կաթողիկոսարանում, երբեմն արքայական պալատում ժողովներ ու խորհուրդներ էին տեղի ունենում — աշխարհական ու հոգևորական անձերի մասնակցութեամբ: Երկրի լաւագոյն գաւալները հաւաքուած հնարներ էին որոնում ստեղծելու Հայկական սեփական տառեր, ունենալու դպրոցներ և հիմք դնելու մայրենի հարազատ դրականութեանը:

Այն օրերը նուիրական էին Հայոց՝

բողջ պատմութեան համար: Երկիրը մի սրբ-
բազան երկունքի մէջ բռնուած — ահաւոր
ու խորհրդաշատ, թագաւորն ու կաթողիկո-
սը, զինւորականն ու վանականը միաբանած
իրար հետ, դարբնում էին հայի ապագայ
կեանքի ուղին: Հայոց Վռամշապուհ թագա-
ւորը պատուաւոր աեղ է բռնում այդ խոր-
հրդակցութիւնների մէջ: Նրա խորհրդով
դեսպաններ են գնում Միջագետք Դանիէլ
անունով մի ասորի եպիսկոպոսի մօտ, որի
մատին իմացել էր Վռամշապուհ թագաւորը,
թէ Հայկական նշանագրեր ունի: Եւ իրօք,
Դանիէլը ունէր Հայկական նշանագրեր, որն
և առնում բերում են Հայաստան: Մեսրոբը
մի անյաղ ծարաւով սովորում է այդ նշա-
նագրերը և անմիջապէս դպրոցներ է բաց
անում սովորեցնելու նաև ուրիշներին: Բայց
մի փոքր անց, աչքի է ընկնում Դանիէլեան
նշանագրերի պակասութիւնը. նրանք լրիւ
չէին, անկարող էին արտայայտել Հայոց լեզ-
ուի մէջ եղած բոլոր հնչիւնները. ուրիշ
խօսքով, Դանիէլեան տառերով չէր կարելի
որ և է հայերէն գիրք գրել: Բուռն և սրտանց
ոգևորութեանն յաջորդում է անտանելի յու-
սախաբութիւնը:

Մեծ և ուժեղ բնաւորութիւնները սա-
կայն չեն վհատում, նեղութեան և անյա-
շողութեան ժամին վառում են նոքա մի
աստուածային եռանդով և անշեղ ու ան-
սայթաք ուխտում են ամեն զոհողութիւն-
ներով հասնել իրենց նպատակին:

Վռամշապուհ թագաւորի ու Սահակ
կաթողիկոսի հրամանով ու խորհրդով Մես-
րոբ վերցնելով իւր հետ մի քանի ընդունակ
և ուշիմ աշակերտներ դարձեալ օտարու-
թեան ուղին է բռնում: Արդէն պարզ էր
մայրաքաղաքում, որ միայն Մեսրոբին կա-
րելի էր յանձնել Հայոց նոր նշանագրեր
ստեղծելու ծանր ու գծուարին գործը: Որով-
հետև Մեսրոբն էր միայն, որ ամբողջապէս
լցուած էր այդ մաքով, ոգևորուած ու յա-
փշտակուած էր ազգային գրի ու գրակա-
նութեան սկիզբ դնելու հոյակապ գաղափա-
րով, ապրում ու տանջւում էր այդ մտքով:
Մեսրոբի երկար ճանապարհորդութիւնը Մի-
ջագետքի զանազան քաղաքներում ծանր և
անհնարին երկունքի մի շրջան էր: Հայոց
ամենամեծ մարդը երկունքի մէջ էր — ծնելու
Հայոց ամբողջ յետագայ շրջանի համար ա-
մենամեծ գանձը, որի վրայ հայը կառուցա-

նելու էր իւրամբողջ վառքն ու պարծանքը, յոյսն ու ապաւէնը:

Երկար ու ծանր էր Մեսրոբի հոգեկան տանջանքը. ուր գնում էր, ում դիմում էր, անյաջողութեան էր հանդիպում: Իւր հետ տարած աշակերտներին նա տալիս է յունաց և ասորոց դպրութիւնն ու արուեստը սովորելու, որպէս զի հմտանան սուրբ Գրքի ընթերցանութեանն ու բացատրութեանը: Իսկ ինքը չի դադարում աղօթելուց և աշխատելուց, ճգնելուց ու տանջուելուց, մինչև որ Սամոսատ քաղաքում նրան յաջողում է մի այբուբէն կազմել, որ իւր մէջ պարունակում էր Հայոց լեզուի մէջ եղած բոլոր հնչիւններն արտայայտող նշանագրեր:

Նոյն ուղղութեամբ շարունակ կենդրոնացած աշխատանքը, հոգեկան երկարատև ճգնութիւնն ու տանջանքը, տագնապն ու նեղութիւնը, սեփական լիակատար այբուբէն և դրա հետ միաժամանակ ազգային դպրոց և գրականութիւն ստեղծելու հնարաւորութիւնն ու բախտաւոր հեռանկարը այնպէս էին յափշտակել Մեսրոբին — այդ աննման մարդուն, որ նա գերագոյն վերացման մէջ մի երջանիկ վարկեանում յաջողում է լիա-

կատար դարձնել Հայոց թերի այբուբէնը և այդպիսով իւր և իւրայինների բոլոր հոգսերն ու տանջանքները փառաւոր ելքով պսակել:

Ամենամեծ գիւտն Հայոց պատմութեան մէջ արուած էր արդէն. Հայն ունէր արդէն սեփական տառեր ու հնարաւորութիւն կար այնուհետև բաց անել Հայկական ուսումնարան: Հազար ու աւելի տարիների պատմական գոյութիւնից յետոյ միայն հային յաջողում է այդ աննման գիւտն անել — ազգային հնչիւնների համար սեփական նշանագրեր ստեղծել: Հազար ու աւելի տարիներ հայը գրել ու կարդացել էր օտար լեզուներով, երբեմն պարսկերէն, երբեմն յունարէն, մերթ ասորերէն: Այժմ նա հնարաւորութիւն էր ստանում իւր մայրենի լեզուով գիրք ունենալու, իւր սեփական, հարազատ հնչիւններով կարդալու:

Հայոց մէջ մի գեղեցիկ աւանդութիւն կայ, որի համաձայն, երբ Մեսրոբ տեսիլքի մէջ ընկած կէս քուն կէս արթուն վիճակի մէջ, յափշտակուած էր ամբողջովին այդ գաղափարով և համակ վերացած — յանկարծ մի գերագոյն վարկեանում մարդկային մի

ձեռք է երևում, որ քարի վրայ գրում է Հայկական այբուբենի պակաս տառերը: Այդ գեղեցիկ աւանդութիւնը մի պերճախօս վկայ է այն բանի, թէ հայերն ինչքան խորն էին ըմբռնել գրի պահանջը, և որքան բարձր են գնահատել այդ բարիքը, այնքան բարձր, որ նոյն իսկ աստուածային ծագումն են տուել դրան: Եւ իրաւ, մեր ամբողջ պատմութեան ընթացքում մենք չունինք մի ուրիշ պարծանք, որին մենք այնպէս երախտապարտ լինինք, ինչպիսին է Մեսրոբի հոյակապ գործը:

*
* *

Մեսրոբի և նրա աշակերտների հրճուանքին չափ չկար: Նորագիւտ տառերը լաւ գծագրելու և ձեւաւորելու գործը Մեսրոբը յանձնում է Սամուսատ քաղաքում Հռոմիային, որն և յաջողութեամբ գլուխ է բերում: Այնուհետեւ Մեսրոբ մի ցանկութիւն ունէր միայն, որքան կարելի է շուտ հասնել Հայաստան, իւր աստուածային գիւտը տանել մայր երկիրը և սկիզբ դնել նոր կեանքի: Այդ մտքով ոգևորուած ճանապարհ է ընկնում գէպի մայրաքաղաք—գէպի Վաղարշապատ:

Այս անգամ բոլորովին այլ էր նրա գալուստը: Առաջին անգամ անօգնական ու մի խեղճ վանական—նա գալիս էր Հայոց կաթողիկոսից օգնութիւն հայցելու, գալիս էր խնդրելու, որ մի ձառ արուի գրի ու գրականութեան համար, իսկ այժմ նա իւր ձեռքում ունէր ցանկալի գիւտը, այժմ նա հպարտ ու գիտակից առաջ էր շարժւում իւր հետ տանելով մի ամբողջ ժողովրդի փրկութեան բանալին: Իրենից առաջ գրերի գիւտի լուրն արդէն հասել էր Հայոց մայրաքաղաքը, այնտեղ իմացել էին նաեւ Մեսրոբի գալուստը, որն եկել մօտեցել էր արդէն մայրաքաղաքին:

Երախտագէտ սերունդը հասկանում է Մեծ Մարդու և նրա գաած տառերի արժէքը: Այդ օրերին Հայոց Վաղարշապատ մայրաքաղաքում տեղի է ունենում մի հանդէս, որի նմանը շատ քիչ է տեսել Հայոց բազմադարեան պատմութիւնը: Ամբողջ քաղաքը դուրս է գալիս ընդառաջ Մեսրոբին, որը ոչ այլ ինչ էր, եթէ ոչ մի սոսկ վանական: Թագաւորն իւր նախարարների բաղմութեամբ, Սահակ կաթողիկոսն իւր եպիսկոպոսներով ու վարդապետներով, մայրաքաղաքի շքեղ

հասարակութիւնը, բուն ժողովուրդը — ամենքը, ամենքը դուրս են գալիս ընդառաջ գնալու եկող Մեսրոբին: Զինւորական մի հանդէս չէր այդ, որի նմանը Հայոց թագաւորները շատ են կազմակերպել, ոչ էլ պատերազմական մի արշաւանք: Հոյ ազգի լաւագոյն մասը դուրս էր գալիս ընդունելու իւր բարերարին, որ բերում էր իւր հետ ազգային ամենամեծ բարիքը — գրականութեան և ապագայ հոգևոր կեանքի հպարտ սկիզբը: Եկողը մի սոսկ վանական էր, բայց տեսէք ինչպէս վերացել է աստիճան ու դիրք, ինչպէս վերացել է ամեն տեսակի խտրութիւն. հայ թագաւորն ու հայ կաթողիկոսը գրկախառնւում են Մեսրոբի հետ, իրանց հարազատի պէս գուրգուրում են նրան ու շատ աչքեր ուրախութեան հրճուանքի տակ թրջւում են, և բոլոր սրտերը անհուն բերկրանքով վառւում են: Ամբողջ մայրաքաղաքի աշխարհախումբ բազմութիւնը բաց դաշտի մէջ — կապոյտ երկնքի տակ սրբանուէր կերպով տօնում է Հայոց պատմութեան մէջ եզակի այդ օրը, տօնում է միահամուռ և համերաշխ, առանց խտրութեան: Այդ ընդարձակ ու բազմազան հասարակու-

թեան մէջ մի բոպէ լռում են ամեն կարգի անհամաձայնութիւն ու բոլորն էլեքտրակահացած. տեղի ունեցած անօրինակ յաջողութեամբ — ցնծալիւր աղօթքներով ու աղաղակներով օդն են թնդացնում: Պատկառելի հանդէսը հոգևոր ու աշխարհիկ երգերի և նուագածութեան ձայնի ուղեկցութեամբ քաղաք է դառնում փառաբանելու տիրոջը, որ հայ աշխարհում այդպիսի մեծ գործ յաջողեցրեց: Ժամանակի պատմիչը բառ չի գտնում արտայայտելու համար այն բարձր ոգևորութիւնն ու անհուն բերկրանքը, որ տիրում էր այն օրերում մայրաքաղաքի և ընդհանրապէս Հայոց աշխարհի մէջ: «Երանելի ու ցանկալի Հայոց աշխարհն անպայման սքանչելի էր երևում այն օրերում. ամբողջ երկիրը լի էր սրտալիւր ուրախութեամբ և ակնավայել տեսարանով»:

Հայերի այդ անսահման ուրախութիւնը շատ տեղին էր և հասկանալի: Ազգերն իրանց պատմութեան ընթացքում շատ քիչ են այդպէս միահամուռ ուրախանում. մաղթանքի խունկը շատ քիչ է այնպէս անկեղծ ու անձնուէր գոհունակութեամբ դէպի երկինք բուռնում: Ամբողջ հայութիւնն յանձին իր թա-

զաւորի և իշխանների, կաթողիկոսի և հոգևորականութեան — մի արտասովոր, գերագոյն ըոպէի մէջ էր: Հայկական տառերի զիւտը բաց էր անում հայի առաջ օտար ազգերի ամբարած հարստութիւնը, անցեալ սերունդների շտեմարանած իմաստութիւնը: Ու համաշխարհային գրականութեան ու դպրութեան մէջ մինչև այդ ժամանակ զլիսովին երեխայ հայը Մեսրոբեան այդ մի քանի տառերի շնորհիւ հնարաւորութիւն էր ստանում ինքն ևս հանդէս գալ իւր իսկ սեփական մայրենի լեզուով գրելու և կարդալու:

*
* *

Մեր իմաստուն և խելացի նախնիքը ամենաբնական կերպով են օգտուում նորագիւտ տառերից: Մեսրոբն էր միայն իւր մի երկու աշակերտների հետ, որ հասկանում էր Հայկական նոր այբուբենի գործածութիւնը և ըմբռնում էր այդ շոր ու ցամաք գծերի՝ նշանագրերի ներքին վեհ խորհուրդը: Հարկաւոր էր բազմացնել, ստուարացնել իմացողների թիւը, հարկաւոր էր սովորեցնել, նոր պատրաստուած մարդիկ առաջ քաշել, որոնք կարողանային իրանց ցանկա-

ցածը գրել հայ լեզուով, հայ նշանագրերով: Հիմք է դրւում մի խորհրդաւոր ու սրբազան հաստատութեան, հիմնարկւում է Հայկական առաջին դպրոցը: որտեղ հայ պատանին պէտք է հայերէն գրել կարդալ սովորէր: Հազարաւոր տարիների կեանքով ապրող հայը առաջին անգամ այդ օրը պէտք է դըպրոց մտնէր, առաջին անգամ պէտք է իւր մայրենի լեզուի հնչիւնները դրոշմէր թղթի վրայ ու առաջին անգամ պէտք է կարդար:

Մենք երեւակայում ենք Մեսրոբի հրճուանքն ու յուզմունքը, երբ նա իւր արիւն քրտինքի պտուղներն այդտեղ, այդ նորահաստատ դպրոցի մէջ վայելում էր, տեսնելով իւր գործի յաջողութիւնը: Մինչև այդ օրերը մենք չենք ունեցել հայերէնի ոչ մի ուսուցիչ: Դժբախտաբար, մեր քաղաքական կեանքի ամենափառաւոր շրջաններն անցան խուլ ու համր կերպով: Հայոց լեռների ու ձորերի վրայով քայլող զնդերի արշաւանքներն ու գործողութիւնները, հայ իշխանի կեանքն ու ձգտումները, հայ քաղաքացու և գեղջուկի ապրուստն ու դրութիւնը մեզ ոչ մի հայ չկարողացաւ պատմել. միայն օտար պատմիչների հատ ու կտոր տեղեկութիւններն

են, որոնք լրիւ ոչինչ չեն տալիս: Մեարոքի գիւտն անսահման ցնծութեան մէջ էր դնում հային, իմացող և գրասէր հային:

Երբ Մեարոքի աշակերտները բաւականաչափ վարժւում են Հայկական այբուբենի գործածութեան մէջ, Սահակ կաթողիկոսն ու Մեարոքը սկսում են բաց անել իրանց հարեան ազգերի՝ յոյների ու ասորիների գրական գանձերը և օտար լեզուներից սկսւում է մի թարգմանչական գործունէութիւն՝ եռանդուն ու տենդային: Նախ հարկաւոր էր ծանօթացնել հային օտար գրականութեան հետ. և ամենից առաջ Աստուածաշունչն էր, հայի նոր հաւատի՝ քրիստոնէութեան ազգիւրը, որ պէտք էր անմիջապէս հայերէն թարգմանել: Չէ որ այդ ամբողջ շարժումը, տանջանքն ու տառապանքը հոգեւոր կրօնական պահանջին բաւարարութիւն տալու համար էր. չէ որ Սահակն ու Մեարոքը մի գերազոյն տենչով բռնուած էին հէնց այդ Աստուածաշունչը, Աւետարանն ու հոգեւոր գործերը հայերէն ունենալու, որպէս զի հեշտութեամբ կարելի լինէր Քրիստոսի խօսքը քարոզել ու տարածել: Այժմ եկել հասել էր ժամանակը, այժմ կար հնարաւորութիւն, և

մեր նախնիքը շատ խելացի կերպով են օգտւում այդ հնարաւորութիւնից: Արտասահմանում՝ Յունաստանում, Ասորիքում և Եգիպտոսում յատուկ մարդիկ են ուղարկւում հմտանալու, վարժուելու հելլենական, ասորական գալութեան և արուեստների մէջ, ուսումնասիրելու օտար լեզուները, որոնցով միայն կարելի էր ծանօթանալ օտար գրականութեան հետ: Երկար տարիներ հայ երիտասարդները մնում են օտարութեան մէջ և գիտութեամբ ծանրաբեռնուած դառնում են Հայաստան իրանց բերած պաշարն հայացնելու, հայերէն թարգմանելու:

Ու սկսւում է մի գործունէութիւն, որի նմանն Հայաստանը չէր տեսել: Պատրաստուած յունաբաններն ու ասորաբանները վերադառնում են Հայաստան ու իրանց երկու մեծ ուսուցիչների ղեկավարութեամբ սկսում են մի բեղմնաւոր ու արդիւնաւէտ թարգմանչական գործունէութիւն, որի համար և յաջորդ սերունդների կողմից ստանում են «Թարգմանիչներ» մեծ ու իմաստալի տիտղոսը: Նախ թարգմանւում է սուրբ Գրքի զանազան կտորներից, իսկ ամբողջ սուրբ Գիրքը երկար տարիների անխոնջ աշխատանք

էր պահանջում: Շնորհիւ թարգմանիչներին՝ հետզհետէ ստեղծւում է Հայոց գրականութիւնը, ստեղծւում է մի գրական լեզու, որ իւր կանոնաւորութեամբ ու ընտիր յատկութիւններով ամբողջ յետագայ շրջանների համար դասական է մնում ու օրինակելի մինչև օրս:

Մեսրոբ շրջում է այնուհետև իւր մի քանի աշակերտների հետ Հայաստանի գաւազան կողմերը, ամեն տեղ դպրոցներ է բաց անում, աշակերտներ հաւաքում և զբաղութեան ու գրական կեանքի սկիզբ դնում: Նոյն եղանակով ռեկտրուած նա այբուբէն է տալիս նաև մեր հարևան երկու ազգութիւններին, վրացիներին և աղուաններին, որոնք հայերի պէս մինչև այդ չունէին գիր ու գրականութիւն և շնորհիւ Մեսրոբ Մաշտոցի սկսեցին մանել քաղաքակիրթ ազգերի շրջանը:

Հետաքրքիր է ու ուսանելի Մեսրոբի յետագայ կեանքը: Եթէ սուրբ կոչուելու են պատմութեան մէջ այն անձնաւորութիւնները, որոնք մոռացած իրանց անձնականը ապրում են ու շնչում ընդհանուրի բարիքի համար, որոնք իրանց օրինակելի վարքով

ու ետագուրի աշխատանքով հասարակաց բարիքն են ի նկատի ունենում — ապա ուրեմն Մեսրոբը իրաւունք ունի մեր ամենամեծ սուրբ կոչուելու: Որովհետև այդ եզակի անձնաւորութիւնը ապրել ու գործել է ռեկտրուած միմիայն ընդհանուրի բարիքով, նրան կեանքի էին կոչում և գործունէութեան մղում: Քրիստոսի վարդապետութեան պարզ և յստակ պատգամները: Այդ պատգամները հասարակութեանը մատչելի դարձնելը, ուրիշներին ևս իսկական ճշմարիտ քրիստոնեայ դարձնելը Մեսրոբի կեանքի նպատակն էր: Այդ նպատակի իրագործմանն էր դիմում, երբ նա աշխարհէ աշխարհ ընկած հայ գրականութեան սկիզբն էր երկնում: Այդ նպատակին էր նա մօտենում, երբ հայ անմշակ ու խոսքան անգաստանի մէջ դպրոցներ էր բաց անում, վերջապէս այդ նպատակն իրագործուած էր տեսնում, երբ իւր ատաջ ուխտացեալ երիտասարդների մի ստուար բազմութիւն էր գտնում, որ թարգմանչական տենչով բռնուած, օտար գանձերն էր հայացնում, օտար գրականութիւնների շտեմարանները բաց անում: Ահա այդ մտքով Մեսրոբ մեր հայերիս ամենամեծ սուրբն է:

Նրա գիւտը՝ կեանքի կոչումը հոգևոր պէտքին՝ քրիստոնէութեան պահանջներին բաւարարութիւն տալու, դարձաւ այնուհետեւ հայի լուսաւոր ու բախտաւոր աստղը, որ պիտի առաջնորդէր նրան դարերի երկար շարքի միջով, նրան ապաւէն ու նեցուկ լինէր, միխթարէր նրան տառապանքի երկար օրերում, յուսադրէր լքման ծանր ու դժուար միջոցին:

* * *

Ե. դարի այդ տարիները Հայոց քաղաքական բախտի տեսակէտից շատ աննպաստ էին: Վառաձագուհի խաղաղ և իմաստուն կառավարութիւնից մի փոքր յետոյ Հայ Արշակունիները գահի վրայ է բազմում մատղահասակ Արտաշէսը, որը շատ հեռու էր երկիրը խելացի ու խոհեմ կառավարելուց, որովհետեւ անպատրաստ էր: Իսկ հայ իշխաններն էլ լայն չափերով ի չարն էին գործ դնում կենդրոնական իշխանութեան թուլութիւնը և իրար հետ մշտական գժտութեան, անընդհատ հակառակութեան մէջ էին: Իրերի այս աննպաստ ու խառնակ դրութիւնից օգտուողը օտարներն էին ու յատկապէս պարսիկներն ու յոյները:

Դեռ չորրորդ դարում Հայաստանը բաժանուած էր այդ երկու պետութիւնների մէջ՝ Յունաստանի և Պարսկաստանի, որոնց մշտական և ուժգին մրցութեանը թոյլ ու անպաշտպան Հայաստանը վերջ ի վերջոյ դո՛ւ գնաց: Բաժանուածութեան արդիւնքն այստեղ այն է լինում, ինչ որ ամեն անգ. պարսիկներն իրանց՝ մասում են հային խեղդում, թաղաւորութեանը վերջ դնում, նոյնն անում են յոյներն իրանց մասում: Եւ արդիւնքն այն է լինում, որ Ե. դարի կիսում արդէն ամբողջ Հայաստանից վերացւում է Հայկական անկախութիւնը և Հայաստանը կառավարւում է օտար ու բնիկ վարիչներով:

Սակայն բախտը տարօրինակ խաղեր ունի. այն օրերին, երբ՝ գունատւում էր Հայոց արքաների ծիրանին, երբ Արշակունիների գահը ընդմիջաւ թափուր էր դառնում և Հայաստանը կորցնում էր իւր քաղաքական անկախութիւնը և բաժանւում միւս պետութիւնների մէջ թուլացած, նուազած — այդ օրերին հայ միաքն ու հոգին լարում էր իւր գերադոյն ճիգերը հիմք դնելու մի նոր ու աւելի հաստատուն կեանքի, որն յաղթելու էր այնուհետեւ ոչ միայն Յունաց

և Պարոնից բռնապետներին, այլ և բոլորին, որոնք կըզային հայի մտքի և հոգեւանկախութիւնը խախտելու: Կորաւ մեր քաղաքական անկախութիւնը, բայց զրա փոխարէն ս. Մեսրոպ և ս. Սահակ մեզ տուին մի գէնը, որով մենք աւելի պիտի պարծենայինք ու մեր փառքը համարէինք, որով զինուած մենք պիտի դէմ դնէինք մեր ամենավայրագ թշնամիներին ու ժամանակաւոր հատ ու կտոր պարտութիւններին մէջ դարձեալ վերջնական յաղթողը դուրս գայինք:

Յետագայ մեր ամբողջ պատմութեան ընթացքում հսկայի նման բարձրանում է ս. Մեսրոպի լուսարձակ դէմքը, որից դուրս եկած ճաճանչները լուսաւորում են Հայոց մոայլ և խաւար մթնոլորդը: Մեր հոգու, մեր մտքի առաջ միշտ պայծառօրէն կանգնած են մեր ազգի երկու մեծ սրբերը—ս. Մեսրոպ և ս. Սահակ, որոնց հովանաւորութեան տակ ծաղկում է մեր գէրն ու զրականութիւնը, դպրոցն ու գալրութիւնը:

*
* *

Ս. Էջմիածնից 12 վերստ հեռու՝ Քասախի ձորափին ընկած է հինաւուրց մի

գիւղ՝ Օշականը, որն է. դարում Ամասունի իշխանների կալուածքն էր: Այդտեղ, Օշական գիւղի եկեղեցու կամարների տակ, ներքնայարկ մի սենեակում հանգստանում են Հայաստանի ամենամեծ մարդու՝ ս. Մեսրոբի նուիրական նշխարները: Դարեր շարունակ նուիրական է եղել այդ վայրը հայութեան համար: Նա նուիրական է դառնում մանաւանդ այժմ, երբ հայութեան բովանդակ հատուածները միահամուռ կերպով գալիս են տօնելու այդ մեծ մարդու և նրա նշանաւոր գիւտի հազար հինգհարիւր ամեայ յօբելեանը:

Հազար հինգհարիւր տարի անցել է այն օրից, երբ ս. Մեսրոպ երկնեց հայկական սեփական զրերը և գրանով իր մեծ ուսուցչի՝ ս. Սահակի հետ սկիզբ դրեց Հայկական գրականութեանը: Այսօրուայ հայը անհուն բերկրանքը սրտին ուխտի պիտի գնայ Օշական, համբուրելու սրբազան նշխարներն այն մարդու, որը երջանիկ էր առաջին անգամ հայերէն տառերով գրելու, որը մեր առաջին թարգմանիչն էր, առաջին հեղինակը և առաջին ուսուցիչը:

Ս. Մեսրոբի նշանաւոր գիւտից անցել է այժմ տաճարի և հինգ դար: Այդքան երկար ժամանակուայ ընթացքում Հայաստանն ու հայ ժողովուրդը բազմադան բախտերի է հանդիպել, բայց ս. Մեսրոբի աւանգը չէ թողել երբէք:

Հայաստանն 5-րդ դարից այս կողմը աստիճանաբար արիւնաբամ է եղած երբեմն նենգ ու նախանձոտ հարկաններին՝ յոյների ու պարսիկների ձեռքից, երբեմն ընչաքաղց, անհանգիստ եկւորների՝ արաբների ու թուրք ցեղերի մէջ: Արաբների տիրապետութիւնը, որ Հայաստանում 7-րդ դարից սկսուելով շաւուհակուհից մինչև 10-րդ դար, յետագայ շրջանների հետ համեմատած, կարելի է տանելի համարել: Հէնց որ նուաճողական գործողութիւններն աւարտում էին, արաբներն սկսում էին երկիրը վերաշինել, կարգ ու կանոն վերահաստատել, իրանք ուսումնասէր մարդիկ լինելով, նուաճած երկիրներն ևս իրանց քաղաքակրթութեանն էին ենթարկում: Այդ է պատճառը, որ յիշուած դարերում Հայոց գրականութիւնը գնալով ճիշտում, զարգանում է: Ճիշտ է, ժամանակի պատմիչները ողբի և աղաղակի մի ամբողջ



Ս. ՍԱՀԱԿ

աշխարհ են հանդէս բերում արաբական տիրապետութեան օրերին, բայց հէնց նոյն պատմիչների գոյութիւնը և նրանց հատուկոր տեղեկութիւնները վկայում են, որ Հայաստանը արաբական իշխանութեան շրջանում համեմատաբար խաղաղութիւն էր վայելում և գրական-քաղաքակրթական կեանքն այն ժամանակ դանդաղ, բայց մըշտական զարգացման մէջ էր: Արաբական պետութեան ներքին էութեանն ու առանձնայատկութիւններին պէտք է վերագրել նաև այն հանգամանքը, որ Հայաստանում կարող էին մի քանի փոքրիկ տեղային իշխանութիւններ կազմուել, որոնցից կարևորն ու նշանաւորը Բագրատունեաց թագաւորութիւնն եղաւ Անիում: Այսօրուայ Անին իւր հոյակապ անցեալի բեկորներով Հայկական ուրոյն կուտուրայի պերճախօս վկայ լինելով, միևնոյն ժամանակ լքացորոշ ու պարզօրէն մեզ պատմում է արաբական քաղաքակրթութեան մասին, որ գոյութիւն է ունեցել Հայաստանում:

Մինչև 10, 11-րդ դարը թէև շարունակ թուրանալով և նուազելով, բայց և այնպէս ընդհանուր առմամբ դեռ պահել է հայ ժո-

ղովուրդը իւր ամբողջութիւնը, կռուելու և դիմադրելու իւր ներքին կարողութիւնը, սովորեցնելու տրամադրութիւնն ու պատրաստակամութիւնը:

Բայց սկսած 11-րդ դարից բոլորովին փոխուում է թէ Հայաստանի և թէ հարևան երկրների վիճակը: Այդ դարում էր, որ Արևելքից — ասիական մեծ ու անսահման դաշտավայրերում թափառող թուրքական ցեղերից հատուածներ են պոկւում գալիս դէպի Արևմուտք, դէպի Պարսկաստան, Հայաստան, և Փոքր Ասիա, այնտեղ ուղղելով իրանց անկուշտ հայեացքն ու սպանիչ զէնքը և սարսափելի անգուսպ հեղեղի նման բարդ առբարդ անպարպելի եռանդով ու թարմ ուժով թափւում են փարթամ ու հարուստ Արևմուտքի վրայ, ճանապարհին ամեն բան կրակի ու աւերածի զոհ դարձնելով:

Նկողները բարբարոսներ էին, որոնց զրոհի առաջ զոհ են դառնում Արևելքի ամենագեղեցիկ քաղաքներն ու յիշատակարանները: Թուրքական այդ ցեղերը յայտնի են պատմութեան մէջ Սելջուկ անունով: Իրանը չունենալով որ և է քաղաքակրթութիւն, թըշնամի և հակառակորդ էին ամեն տեսակ կարգ

ու կանոնի: Նրանց զօրութիւնը կրակի ու արեան, սրի և աղեղի վրայ էր հիմնուած: Միւս երկիրների հետ Հայաստանն ևս արիւնաքամ է լինում, զրկւում իւր բարեբեր դաշտերից, շէն քաղաքներից ու նրա մէջ ապրող ժողովուրդը հիւժուում, ուժասպառ է դառնում սելջուկների նիւթական անծայր շահատակութիւններից:

Յաջորդ դարերը Հայաստանի համար մի ուրիշ սոսկալի պատուհաս է բերում — մոնղոլական կամ թաթարական արշաւանքը: Թաթարները նոյն թուրքական ցեղերի յետագայ սերունդներն էին, աւելի յանդուգն ու արկածախնդիր, աւելի մեծ մտքերով ու նուաճողական լայն ծրագրերով: Բաւական է յիշել Զինգիզ խանի և Լէնկ-թեմուրի անունները, որ Արեւելքը դեռ այսօր էլ սարսափի: Թաթարները բոլորովին ոչնչացնում են քաղաքակրթութեան այն մնացորդները, որ սելջուկների բարբարոսութիւնից զերծ էին մնացել: Միջին և Առաջաւոր Ասիան նրանց կարող և խորտակիչ սրի տակ տխուր աւերակների մի շեղջակոյտ դարձաւ լոկ. Արեւելքը կարծես ամայացել էր. վաճառաշահ հարուստ ու փարթամ շահաստանները կողոպտուեցին,

հոյակապ ու հաստապինդ շէնքերը խորտակուեցին: Մոնղոլների հասցրած հարուածներից գլուխը կորցրած Արեւելքը դեռ շատ դարեր չախտի ուշքի գար. այդ կարճահասակ ու գաճաճ մոնղոլները Արեւելքի քաղաքակրթութեան ընթացքը երկար ժամանակով յետ պահեցին:

Թուրք թաթարական ցեղերի աւերն ու կոտորածը շարունակուեցին մինչև 15-րդ դարը: Բայց դրանից յետոյ խաղաղ ու հանգիստ օրերը չէին, որ պիտի վայելէր Հայաստանը: Սկսած 15-րդ դարից մինչև 18-րդ, մինչև 19-րդ դարի առաջին տասնամեակները Հայաստանը կռուախնձոր է լինում Պարսկական և Օսմանեան պետութիւնների մէջ: Ընկած լինելով երկու թագաւորութիւնների մէջ տեղում, բնականաբար Հայաստանը պէտք է կռուախնձոր լինէր և բոլոր սահմանային կռիւների բուն պատճառը: Միայն 19-րդ դարն է, որ Առաջաւոր Ասիայում, դրա հետ միասին և Հայաստանում տանելի խաղաղութիւն է մտնում: Այս ժամանակ է միայն, որ Հայաստանի սահմանները մի փոքր աւելի տեւական կերպով են որոշւում և Հայաստանը բաժանւում է

Ռուսաստանի, Տաճկաստանի և Պարսկաստանի մէջ:

Այսպիսով տեսնում ենք, որ հայ ժողովուրդը Արշակունեաց թագաւորութեան անկումից յետոյ հետզհետէ ակնառես է եղել, թէ ինչպէս իւր վրայով եկել անցել են բազմաթիւ ժողովուրդներ, տարբեր լեզուներով և սովորութիւններով, տարբեր կրօնով ու դաւանութեամբ, քաղաքակրթութեան և զարգացումի զանազան աստիճաններով: Եղել են ժամանակներ, երբ հայը ամեն բան կորցնելու վտանգի մէջ է եղել. և՛ լեզուն, և՛ ազգային առանձնայատկութիւնները, և՛ եկեղեցին ու կրօնը, եղել են ամբողջ դարեր, երբ ս. Մեսրոբի հրաշալի գիւտը կարծես լռել է: Ֆիզիքական գոյութեան կռուի մէջ ընկած ու տարուբերուող ժողովրդի համար շատ անգամ գիրն ու գրականութիւնը, մտաւոր ու հոգեկան շարժումը գերմարդկային է երևում:

Ու գերմարդկային վարկեաններ բաւականաչափ ունի Հայոց պատմութիւնը: Իւր բազմադարեան տանջանքի ու գերութեան, իւր հազարամեայ տառապանքի օրերին հայ ցեղը կարողացել է իրան պահել, ֆիզիքա-

պէս ապրել ու չանհետանալ, չսպառուել: Դա էլ հերոսութիւն է. դարեր տևող թալանի ու աւերածութիւնների մէջ ապրել, հազար տարիներից ի վեր ակնառես վկայ և առարկայ լինել զանազան ցեղերի ընչաքաղց կռիւների ու ասպատակութեանց, հետզհետէ քամուել ու հիւծուել, բայց և այնպէս ապրելու մի անդիմադրելի ուժեղ մղումով տարուած յաղթել այդ բոլոր խոչընդոտներին ու հասնել մինչև այսօր — դա լուռ ու անաղմուկ, համր հերոսութիւն է:

Հայ ցեղի ֆիզիքական կեանքն աւելի բովանդակութիւն է ստանում և նրա անցեալը մեզ աւելի բարձր երևում, երբ ինկատի առնենք, որ հայը իւր ֆիզիքական գոյութեան հետ պահել է նաեւ իւր հոգեկան — ներքին անկախութիւնը:

Մինչև անգամ ամենագառն օրերին, աւերածութիւնների ու տառապանքի ամենասե ճգնաժամին էլ Հայաստանում եղել են անկիւններ, ուր մեր նախնեաց նուիրական աւանդը՝ հայ գիրն ու դպրոցը շարունակուել է փալփալ: Վանքերի և մենաստանների, այրերի ու քարանձանների մէջ միայն կարող էր ապրել մեր անցեալի գիրն ու գրա-

կանութիւնը, դպրոցն ու դպրութիւնը: Դարեր շարունակ դրական մտաւոր կեանքն հազիւ է պահել իւր գոյութիւնը. հազիւ են գտնուել մի քանի վանականներ, որոնք աշխարհի խառնակ ու անապահով գրութիւնից վանքերն ու մենաստաններն ապաւինելով, գրի են անցրել ու յաջորդ սերունդներին հաղորդել իրանց ժամանակի անցքերը, պարբերական գէպքերը: Աւելի շատ են եղել այնպիսիները, որոնք զուրկ լինելով ստեղծելու, յօրինելու շնորհքից, ուրիշի աշխատանքն են արտագրել: Մեր աշխարհի երկարատեւ միջնադարեան երկնակամարի վրայ ժամանակ առ ժամանակ աստղեր են առկայծում, որոնք իրանց փայլով մի ըռպէ լուսաւորում են անթափանց խաւարը ու նորից մարում: Դրանք մեր դպրոցներն են, «անապատները», ուր հանդէս է գալիս մի վարդապետ, ուսուցիչ և զիտնական, պարապում է գրականութեամբ, ուսումնասիրում է անցեալի յիշատակարանները, մեր նախնիքների գործերը, ինքն ևս հետևում է նրանց օրինակին, պարապում է գրականութեամբ և գրքեր գրում: Նրա շուրջն են հաւաքւում ուսումնածարաւ պատանիներ և երիտասարդ-

ներ ուսանելու հռչակաւոր ուսուցչի իմաստութիւնը:

Այդպէս են եղել մեր միջնադարեան դպրոցները ու այդ դպրոցների մէջ է պարփակուել մեր ամբողջ գրական մտաւոր հոգեկան կեանքը. այդտեղ է ապրել ու զարգացել հայ գիրքը:

*
* *

Մարդիկ մինչև 15-րդ դարը գաղափար չունէին տպագրութեան մասին: Մեր նախնիքն ուրեմն Հայկական գրերի գիւտից յետոյ 11 դար շարունակ տպագրուած գրքի երես չեն տեսել: Գիրքը տարածուել է արտագրութեան միջոցով, վանքերում եղել են մարդիկ, որոնք զբաղուած են եղել արտագրութեամբ: Մեր օրերում արտագրութիւնը, այն էլ մեծ ու հաստ հատորների արտագրութիւնը ծանր ու սրտամաշ պարապմունք է. բայց առաջ, երբ դեռ տպագրութիւնը չէր հնարուած, մարդիկ առանձին եռանդով ու երկիւղածութեամբ էին արտագրում. որովհետեւ բացի կրօնական բարոյական մխիթարութիւնից, գիրք գրողն ու արտագրողը այն բարձր գիտակցութեան տէրն էր, որ դրանով պահում պահպանում է

ազգային գրականութիւնը, շարունակում է նախնիքների սկսած մեծ գործը և եկող սերունդներին աւանդում անցեալի յիշատակարանները: Դիշեր ցերեկ աքնելով շատ անգամ վանական ճրագի ազօտ լոյսի տակ կուրացած, արտագրւում էին հինգերորդ ու յետագայ դարերի յիշատակարանները: Այդ եղանակով հետզհետէ կազմւում է մի հրակայական ձեռագիր գրականութիւն, որի անշուշտ մի փոքր մասն է այսօր մեր ձեռքում մնացել: Այսօրուայ ձեռագիր մատենադարանները (ս. էջմիածնում, Վենետիկում, Վիեննայում, Երոսաղէմում, Պոլսում, Փարիզում...) մեզ մօտաւոր գաղափար են տալիս միջին դարերի գրական գօուարին և ծանր պարապմունքի մասին:

Դիրքն ուշ էր գրւում, դժուար էր առաջ գալիս, ծանր էր տարածւում և շատ թանկ էր ծախւում: Այնպիսի հանգամանքներ էին դրանք, որ համարեա անյաղթելի խոչընդոտներ էին հանգիստնում գրքի զարգացման համար: Կարծես մի որոշ դասակարգի սեփականութիւն էր դարձել գիրքը, նախ՝ վանքի, որտեղ նա գրւում, արտագրւում էր— որտեղ նա ստեղծւում էր, և ապա ունեւոր-

ների, որոնք միայն գնել և նրա ներքին արժէքը ըմբռնել կարող էին: Միջին դարերում գիրք արտագրել տալը մեծ բարեգործութիւն էր համարւում, որովհետեւ թանկ էր և ամեն մարդու ուժերից վեր:

*
* *

Դրութիւնը փոխւում է 15-րդ դարում, երբ տպագրութիւնն է հանդէս գալիս:

Գերմանական շէն ու շքեղ քաղաքներից մէկում՝ Զոհենտսի ափերին փռւած Մայնց քաղաքում 14-րդ դարի վերջին՝ 1397 թուին մի մարդ է ծնւում— Յովհան Գուտտենբերգ, որն և դառնում է մարդկութեան ամենամեծ բարերարներից մէկը: Պատմութիւնից յայտնի է, որ մինչև Յովհան Գուտտենբերգի գիւտը, ասիական ազգութիւններն ունեցել են տպագրութիւն, յատկապէս չինացիները: Բայց չինացիներն, ինչպէս ամեն բան, այնպէս էլ տպագրութեան արուեստը իբրև պետական գաղտնիք իրանց մէջ են պահել և միւս ազգութիւններին չեն հաղորդել, այնպէս որ եւրոպական ազգութիւններից ոչ մէկը տեղեակ չէր տպագրութեան գործին Յովհան Գուտտենբերգի գիւտից առաջ:

Գուտտեմբերգը՝ իրանից առաջ եղած մի քանի թոյլ փորձերն աչքի անցկացնելով տարւում է ամբողջապէս շարժական մետաղեայ տառերով տպելու գաղափարով և 1436 թուին հնարում է այդ տառերը: Այնուհետև մինչև առաջին տպագրուած գրքի լոյս տեսնելը անցնում է դարձեալ 14 տարի և 1450 թուին հանգէս է գալիս առաջին տպուած գիրքը—Աստուածաշունչը:

Գրքերի տարածման, ժողովրդականացման և էժանացման ամենամեծ արգելքներից մէկը վերացել էր. գտնուած էր տպագրութեան մեծ ու հոյակապ արուեստը և հիմք էր դրուած քաղաքակրթական մի նոր հաստատութեան՝ տպարանին: Այնուհետև եւրոպական ազգերը մինչև այդ ժամանակ չտեսնուած արագութեամբ դարգացնում, ծաղկեցնում են գրականութիւնը: Բազմապէս են տպարաններն և գրքերը հազարներով ու տասնեակ հազարներով ցրւում ազգաբնակչութեան զանազան խաւերի մէջ: Դիրքը դուրս է գալիս վանքից ու մենաստանից. հեղինակն ու թարգմանիչը լինում են հետզհետէ նաև աշխարհականներ, և գիրքն ու գրականութիւնը թէև աստիճա-

նարար, բայց հաստատուն ու վճռականօրէն բռնում է ժողովրդականացման փրկարար ուղին: Յովհան Գուտտենբերգը գտնում է մարդկութեան մեծագործ բարերարը:

*
* *

«Գուտտենբերգի մահից միայն 44 տարի յետոյ՝ 1512 թուին լոյս է տեսնում նաև հայերէն տպագրուած առաջին գիրքը: Ուրեմն այս տարի լրանում է ուղիղ չորսհարիւր տարի այն օրից, երբ մինչև այժմ մեզ հասած տեղեկութիւնների համաձայն առաջին հայերէն գիրքը տպուեց:

Մեզ արդէն յայտնի է Հայաստանի վիճակը 15-րդ, 16-րդ դարերում: Աւերի և սրածութեան մի հայրենիք էր դա: Պարզ է, որ չէր կարող խաղաղ կուլտուրական աշխատանքն աշխալիսի երկրում բուն զինել ու յառաւ գարգացման ուղին բռնել: Երկրից լուրս էին եկել և զեռ շարունակում էին դուրս գալ զանազան հատուածներ — գաղթականութիւններ, գնում, ցրւում էին զանազան կողմեր, իրանց համար նոր հայրենիք էին գտնում, թէև օտար՝ բայց աւելի տպանով ու հանգիստ, սրտեղ կարող էին

գոնէ չիրանց կեանքն ու համոզմունքները, իրանց ազգութիւնն ու ապահովութիւնը պահել պահպանել, թէև իհարկէ կարճ ժամանակով:

Երբէք չպիտի զարմանանք, որ առաջին հայ գիրքը տպւում է Հայաստանից դուրս, իտալական երկնքի տակ, Վենետիկ մեծ ու վաճառաշահ քաղաքում: Դժբախտաբար մեզ մինչև օրս յայտնի չէ, թէ ով կեանք տուեց հայերէն առաջին տպագրուած գրքին: Ոչ մի տեղեկութիւն չկայ այն մարդու մասին, որ Վենետիկում 1512 թուին տպագրում է «Պարզատումար» վերնագրով առաջին հայ գիրքը: Այդ գիրքն հետևում էր գործնական նպատակների, որովհետև «Պարզատումարը» ժողովրդական մի օրացոյց էր՝ սահմանուած հայ հասարակութեան աւելի լայն խաւերի համար: Հետևեալ տարին դարձեալ Վենետիկում լոյս են տեսնում մի քանի ուրիշ գրքեր ևս և այնուհետև հայ գրքի տպագրութեան վայրերը փոխւում են, բազմանում: Տպագրութեան սկզբնական շրջանում զանազան երկիրներում ցրուած հայկական գաղութներն էին, որոնք առժամանակ պահպանում էին հայ գիրքը: Օտար

քաղաքներում ու մեծ մասամբ օտարներին տպարաններում էր, ուր լոյս էր տեսնում հայ գիրքը ու այնտեղից տարածւում դէպի ամեն կողմ: Վենետիկ ու Պօլիս, Փարիզ ու Մարսել, Լիստոն և Միլան, Նոր Զուլա և Մադրաս, Տրիէստ Վիեննա, Ամստերդամ ու Զմիւռնա... փոփոխակի բախտերով հիւրընկալւում են հայ գիրքն ու տպարանը:

Փոստատներէրգի գիւտը այդ բոլոր օտար վայրերում օգնել ու օժանդակել է հայ գրքին, որը շատ անգամ օտար ու անհիւրընկալ հորիզոնների տակ ստիպուած է եղել դժուարանցանքի ուղիներ բռնել ու ծանր պայմանների մէջ ապրել: Տեղերը յաճախակի փոխելով, երբեմն հարաւի պայծառ երկնքի տակ, յարմարաւոր ու գոհ, երբեմն հիւսիսի մշուշապատ երկնակամարի մոայլ հորիզոնների մէջ — երկու դէպքումն էլ օտար ու բուն երկրի կարօտը ճակտին — միշտ առաջ է գնացել հայ գիրքը, արձագանք տալով հայ ժողովրդի, հայ մտաւորականութեան ժամանակակից պահանջներին, միշտ հոգևոր ու մտաւոր անունդ տալով այն ժողովրդին, որին ծառայելու համար հանդէս էր եկել:

Համարեա բոլոր հայ գաղութներում երևան է եկել նա, համարեա ամենուրեք ուղեկցել է նա հային ու այդ հանգամանքը քան առաւել որևէ այլ բան պատիւ է բերում հայ ցեղին, յառաջադիմելու, քաղաքակրթութելու նրա տենչանքին: Սակայն նա հանգստանալ կարող էր վերջիվերջոյ բուն իսկ հայրենիքում. և երբ նա միանգամ այստեղ հաստատուեց, այլ ևս չէր թողնելու հայ իրականութիւնը:

Ժիշտ է, օտար վայրերում նա ունեցել է երբեմն ծաղկման շրջաններ, տուել է առատ պտուղներ, երբեմն օտար հորիզոնների տակ նա եղել է լուսաւոր աստղ հայրենիքում խաբխափող ժողովրդի համար, բայց նրա ազատութիւնն ու ուրախութիւնը պէտք է որոնել բուն իսկ հայրենիքում, հայ ժողովրդի մէջ, նրա ցաւերին ու դարդերին զիտակ և կարեկից, նրա ուրախութիւններին ու բերկրանքին խնդակից: Հայ մատենաւր իւր բուն գերի մէջ կարող էր մտնել միայն հայ իրականութեան սահմաններում: Եւ այն օրից նա յառաջադիմել է մերթ դանդաղելով ու յամբընթաց, մերթ սրբնթաց և ուսիրեններով — բայց միշտ յառաջխաղաց, միշտ

անշեղ իւր կէտ նպատակին դիմելով: Անշուշտ շատ ազգերի մենք կարող ենք նախանձով նայել ու տեսնել, ինչքան արդիւնք, ինչպիսի հարստութիւն են հանդէս բերել նրանք թերևս աւելի կարճ ժամանակում քան մենք հայերս չորս դարում: Բայց ով ի նկատի ունենայ հայ ցեղի և իրականութեան մարտիրոսագրութիւնը, ով չմոռանայ այն անբնական ու դժուարին կացութիւնը, որի մէջ զրուած է եղել հայ ազգը այդ միջոցին, նրա սիրտն անշուշտ մի անհուն բերկրանքով կըլցուի, որ հայն ունեցել է դեռ քաջութիւն և արիութիւն տանելու բախտի հարուածները, փրկելու իւր մտաւոր ու հոգեկան կեանքը, ազատելու իւր գիրքը մարտիրոսագրութիւնից ու բերելու մեզ հասցնելու:

*
* *

Մեր պատմութեան մեջ երկու շրջան կայ, որոնք իրարից թէև հազար տարով հեռու, բայց իրար հետ ներքուստ սերտօրէն կապուած են ու իրար լրացնում են. դա հինգերորդ դարի սկիզբն է ու տասնևմեցերորդ դարի սկիզբը: Ս. Մեսրոպ հնարեց հայի

այբուրէնը, ուղղութիւն տուեց հայ գրականութեանը, թարգմանիչներն ու նրանց աշակերտները զարգացրին, շարունակեցին այդ գործը, Հայաստանի գանազան մասերում հիմնեցին դպրոցներ, աշակերտներ ժողովեցին ու Հայաստանի մայր մտնող քաղաքական աստղից յետոյ Հայոց երկնակամարում վառեցին մի այլ աստղ, աւելի տեւական ու դիմացկուն, աւելի կենսունակ ու փայլուն. դա մեր մտաւոր, հոգեկան կեանքն էր, որ Ե. դարում այնպէս հսկայտ սկիզբ առաւ:

Իսկ 16-րդ դարի սկիզբը—թէև Հայաստանից դուրս, լուռ ու անաղմուկ, նոյնիսկ աննկատելի, բայց ապագայի համար անգնահատելի, մի գործ էր կատարում. ս. Մեսրոպի ստեղծած գիւտին մի աներևակայելի ասպարէզ էր տրւում, ապագրւում էր առաջին հայերէն գիրքը. որը դուրս գալով իւր ակամայ բանտարկութիւնից հաւորաւորութիւն էր ստանում հետզհետէ լինելու ամեն տեղ և դառնալու ամենքի սեփականութիւնը:

Ներկայ թուականը մեզ մի հոյակապ առիթ է ապրիս տօնելու հայ գրի հազար-

հինգհարիւրամեակը և Հայկական ապագրում թեան չորսհարիւրամեակը: Այսօր Հայ դպրոցն ու գրականութիւնը, Հայ մտաւորականութիւնն ու ժողովուրդը տօնում է իւր գրի և գրքի մեծ ու բազմադարեան յոբելեանը:

Մի անգամ ևս մեր մտքով անցկացնելով մեր բազմատանջ և չարաչար տառապանքով լի անցեալը, մխիթարուած կարող ենք այսօր դէպի առաջ նայել և երախտագիտութեան մի անհուն զգացմունքով լցուել դէպի մեր նախնիքը, որոնք անցեալ փառքի բեկորները կողքին մեզ բերել հասցրել են մեր ազգային գանձերից ամենից մեծը — մեր լեզուն ու գրականութիւնը, մեր գիրն ու դպրութիւնը:

Մուսլ խոհերի, սե յուսահատութեան մի անցողակի ընդէում թերևս կարողանար Հայ բանաստեղծն ասել.

Մեզ ինչ թողին մեր քաջարի գոված
նախնիք,

Հացի, կոծի, անխառնակ մի հայրենիք.

Բայց այդ տրամադրութիւնը մեզ համակել չի կարող, որովհետև այսօր աւելի

քան երբեկիցէ երևան է գալիս մեր նախնիք-
ների ամենամեծ աւանդը, որին մենք այդ-
պէս գործով փարել կարող ենք, որով մենք
հպարտանալ և ողորդուել կարող ենք. դա
հայ գիրն է ու հայ գիրքը:

Փառք ու պատիւ նրանց, որոնք երկ-
նեցին Հայ գիրն ու գրականութիւնը, ար-
համարեցին անձնականն ու նիւթականը ու
երկար և ձիգ զոհողութիւնների միջով ա-
ռաջ տարան Հայ գրքի զփռաբերն գործը և
մեզ այսօր եզակի առիթ տուին տօնելու
Հայ գրի և տպագրութեան այդ պանծալի
հանդէսը: Դա անդուգական տօնն է ամենքի,
որոնք այդ դարերի շարքի մէջ աշխատել
են ու նպաստել Հայ մտքի մշակման, Հայ
հոգու լաւագոյն արդիւնքների, Հայ յոյգերի
առողջ զեղումների. դա համայն հայութեան
լաւագոյն մտքերի, ազգային մտաւորակա-
նութեան փառապանծ տօնն է:



Հայ գրի և տպագրութեան այս Մեծ
Յօրելեանը արժանապայել ու փառաւոր տօ-
նելու, տօնի նշանակութիւնն ու պատմական
արժէքը ժողովրդականացնելու, այլ և Մեծ
Յօրելեանը զանազան հասարակական ու ան-
հատական ձեռնարկութիւններով յաւերժաց-
նելու համար Էջմիածնի Յօրելեանական Յանձ-
նաժողովը որոշեց դիմել Վեհափառ Կա-
թողիկոսին և ինդրել, որ քարեհաճի ա-
ռաջիկայ տարին յայտարարել Յօրելեանական
Տարի, ինչպէս որ դա նման դէպքերում սո-
վորական է Եւրոպայում:

Վեհափառ Հայրենայեալ քարեհաճեց յար-
գել Յանձնաժողովիս խնդրը և պատուիրեց
քաց անել Յօրելեանական Տարին այս աշնան,
Թարգմանչաց տօնին, հոկտեմբերի 13-ին,
ինչպէս որ արդէն յայտարարուած է: Բաց-
ման հանդէսները ամեն տեղ կատարուելու
են Էջմիածնի Յօրելեանական Յանձնաժողովի
մշակած ծրագրով: Իսկ առաջիկայ սարուայ
աշնանը, դարձեալ Թարգմանչաց տօնին, կը
լինին մեծ հանդիսաւորութեամբ Յօրելեանական
Տարուայ փակման հանդէսները:

Յոգեղենական Տարուայ ընթացքում՝
հնարաւորութիւն կըտրուի բոլոր հաստատու-
թիւններին, համայնքներին, ուսումնարան-
ներին ըստ տեղի ու ժամանակի յարմարու-
թեան՝ զանազան հանդէսներով, դասախո-
սութիւններով եւ այլ ձեռնարկութիւններով
կըրօժսանն մասնակցել տօնախմբութեանը:
Այդ ժամանակուայ ընթացքում՝ հնարաւո-
րութիւն կունենանք ֆոնդերի գործը առաջ
մղելու եւ զանազան գրական, գիտական եւ
ժողովրդական հրատարակութիւններով տօնի
յաւերժացմանը նպաստելու: Շատ ցանկալի
էր նոյնպէս աշակերտական եւ մեծերի էջա-
կուրսեաներ եւ ուխտագնացութիւն կազմա-
կերպել դէպի ս. Մեսրոպի հանգստավայրը,
Օջական:

Սրանով խնդրում ենք բոլոր վայրերի
հայ հասարակութեանը իւր կարողութեան չա-
փով նպաստելու փառաւոր կերպով տօնելու
մեր գրի եւ գրականութեան, գրքի ու տպա-
գրութեան օրը, երբ որ:

Ս. Էջիւածեի Երեւանի Թանգաւոցի
նախագահ՝ Գալուստ Սե. Սեւեռեան.
Եւ Կարո Սեւեռեան.

ՀՀ Ազգային գրադարան



NL0120494

